

iritzia

gaurko...

...elkarritzeta



IÑAKI MARTIN

• TXIROEKIN BAT EGINIK
TALDEKOA •

«7000 kaltetu baino gehiago daude Araban»

Giza bazterketaren aurkako
mobilizazioak deitu dituzte
Arabako hainbat taldek.

■ Bazterketa soziala are- agotu dela uste duzue?

Bai, azken hiru urteetan kontu horretara bideraturiko diru ekarpena 9.000 milioi pezetakoa izan da, aldaketa barik, eta ez da aski. Horrez gain, gero eta zailtasun handiagoa dago laguntza horiek eskuratzeko. *Jauregi legea* delakoak asko murriztu ditu laguntzak. Lehen, pertsona bakoitzak bere laguntza jasotzen zuen; orain pisu berean bizi diren pertsona guztiek laguntza bakarra jasotzen dute guztientzat.

■ Zenbat kaltetu daude?

Esan dezakegu Araban 3.500 lagunek jasotzen dituztela bazterketaren kontrako laguntzak, baina uste dugu beste horrenbeste daudela laguntza horiek jasotzeko moduan.

■ Zer aldatu behar dute erakundeek?

Batez ere jarrera. Orain arte laguntza politika izan da, ez gizarteratzera bideratutakoa. Uste dugu egoera horrekin amaitzea pertsona ororen eskubidea dela. Aurrekontua igotzea beharrezkoa da, une honetan dagoen aurrekontuarekin bazterturik bizi direnen erdia laguntzarik gabe gelditzen da. Horrez gain, ekarpenak gutxieneko soldatarekin parekatzea, laguntzak jasotzeko adina 25etik 18 urtera pasatzea eta giza-banakoaren eskubidea izatea eskatzen dugu.

Iban Santamaria

GASTEIZ

...esaera

«Goiz jaikia, goiz gose; berandu jaikia, loz ase»

...hizpideak

Daewooren afera: sakoneko eztabaidarako aukera

■ Azterketa sakona eta luzea egin ostean, euskal erakundeek Daewoo multinazionalari emandako diru laguntzak legez kanpokoak direla ebatsi du Europako Batzordeak. Hego korearrek hozkailuak produzitzeko 11.850 milioi pezetako inbertsioa egin zuten Jundizen, eta horretarako Jaurilaritzak eta Arabako Aldundiak pizgarri oparoak eman zizkieten.

Bruselaren erabakiaren jatorrian, besteak beste, Euskal Herrian oso errotuta dagoen etxetresna alorreko Daewooren lehiakide batek jarritako salaketa dago. Hari horretatik tiraka, Bruselak auzitan jarri du euskal erakundeen ahalmen fiskala eta ekonomikoa. Gasteizko agintariek esan dutenez. Eta horrek kezka eragin du bertako enpresarien artean, gero-

ra atzerriko inbertsioak erakartzeko kaltegarri izango delakoan. Jaurilaritzak ere haserrea azaldu du Bruselaren erabakia dela eta.

Herritarrok zergatan ordaintzen dugun diru publikoaren erabilera kontrolpean dagoela jakitea lasaigarria izan daiteke, kontrolatzaileak zintzo eta ezkutuko interesik gabe jokatzeko badu berea. Hala ere, hori ez dago hain argi Daewooren aferaz Bruselak hartu duen erabakiaren oinarrian, Madrildik presio politikoak izan direla kritikatu baita Euskal Herrian.

Dena dela, eztabaida hau beste sakoneko kontu bat azaleratzeko baliagarri izan liteke: zergen bidez bildutako baliabide publikoak zer eta noren onerako erabiltzen diren, alegia.

Nazioartera zabaltzen

■ Australiak iragarri berri du nazioarteko kontaktutaldea bat osatuko dela Ekialdeko Timorko bake prozesua bultzatzeko. Australiaz gain, EEB-Bek, Europako Batasunak eta Japoniak osatuko dute taldea, munduko herrialde boteretsuenetako batzuek. Ez da seinale txarra gatazka horren erantzukizuna nazioarteko komunitatera zabaltzea, batik bat Indonesiaren gain egin dezakeen presioagatik.

Arrazismo instituzionala

■ Stephen Lawrenceren hilketaren ikerketak eta honen ondorioek hautsak harrotu dituzte Erresuma Batuan. Stephen, 18 urteko beltza, Londresen hil zuen gazte zuri talde batek 1993an, baina ustezko bost errudunak libre utzi zituen Poliziak irregulartasunez jositako instrukzioaren ondoren. Stephenen gurasoek errekurritu egin zuten, eta sei urte geroago Jack Straw Barne ministroak onartu egin du funtsezko aka-

tsak izan zirela prozedura hartan. Hala ere, Strawk ez du beharrezkotzat jo Londresko Poliziaren buru Paul Condon kargugabetzea.

Gertatutakoa «arrazismo instituzionala» dela esan du Condonek, eta hainbat neurri iragarri ditu egoera hau aldatzeko. Poliziaren Federazioak onartu egin du arrazismoa badela instituzioan, baina «harriturik» azaldu da «gizarte osoan erroturik dagoen fenomenoaren errudun gisa» ageri delako.

...pertsonaiak



ANDRES NAGEL • Artista-
ren *Bide bazter* era-
kusketa zabalduko da
gaur Donostiako Kol-
do Mitxelena Kulturue-
nean. 68 artelanak
apirilaren 24a arte
izango dira ikusgai.



JOHN BENJAMIN TOSHACK •
Errealeko entrenatzaile
ohiak Real Madrid
taldea zuzenduko du.
Guus Hiddink holan-
darraren tokia hartu-
ko du galestarrak
hurrengo liga partidutik aurrera.



JORGE OTEIZA • Bartzelo-
nako Terrassa hirian
izan da Orioko artista
bertan jarri behar
duten bere eskultura-
ren lanak ikuskatzen.
Malevitx-i omenaldia
du izena eskulturak.

...datua

47 lagun hil eta 33 desagertu dira Alpeetan, azken asteetako elur jauzien ondorioz. Austria, Frantzia, Italia eta Suitzako Alpeetan izan dira elur jauzi garrantzitsuenak.

...adierazpena

«Tuteran gure izaeraren zati bat,
euskal izaera, ez dago ondo
ulertua»

Milagros Rubio

Batzarreko zinegotzia Tuteran

... seiko urrea

ANDRES URRUTIA

Bilbotarkeriak ote?



tatea eta aparteko ezagupidea, mundu osoan zehar ikusgarri baitira halako filmak.

Izan da, lehen esan legez, bestelakorik ere Bilbon.

Euskalduna izeneko jauregiaren irekiera dela eta, jai berezitsuak Bizkaiko hiriburuan. Hasierako egunean aginte eta deduzko jendea; hurrengoan, aldiz, edonor ikusle, horretarako izena zerrenda batean eman eta, zozketa tartean zela, saridun suertatu.

Berehala plazaratu dira eraikin berriaren ezaugarriak. Halako eszenatoki erraldoia, hainbateko aulkidun tegia... oro da handia antzerki, kongresu eta musika toki berri horretan.

Jauregi berriari izena eman dio leku bereko eta aspaldiko ontzigintza lantegiak. Izana ere, ontziaren tenorekoa du, horretarako gogo izan eta erakutsi baitute arkitektoek. Horra hor, iruditan emana, Bilbo

berriaren bilakaera: burdin eta altzairutik zerbitzuko arlora.

Bilbotarkeriak ote? Ez dut uste. Nahiago dut azken horretan nabarmendu gogo berri bat, goi mailako hats bat, behin batean izan zena ostera ere eskuratzekoa baino, gizarte bilbotar berri baterako urratsak garatu eta kanporatzekoa.

Urrats horiek tinkotzeko ahaleginean, zilegi bekit, bilbotar moduan eta jauregi horren izena eta izana aitzaki eta akiakulatza hartuta, beste behin ere, euskalduntasunaren alde jokatzeko, aurkakoak ez baitira, batzuek hala uste arren, bilbotar izaera, kultura, herri zentzuna eta euskara. Txinboak beti txinbo, jakina.